

Ni Presidente
Thomas S. Monson



Agulimekka, Agtalnaka

Maysa nga aldaw, kalpasan ti panangasikasok kadagiti trabahok iti opisina, nakariknaak iti napigsa a parikna a mapan sumarungkar iti baket a balo a babai a pasiente iti sentro a pagaywanan kadagiti babbaket ken lallakay iti Salt Lake City. Nagdiretsoak a napan sadiay.

Idi napanak iti siledna, awan isuna sadiay. Dinamagko ti maysa nga attendant no sadino ti yanna ket intudona iti paginanaan a lugar. Idiay a nasarakak daytoy makaay-ayo a balo a babai a makisarsarita iti kabsatna a babai ken sabali pay a gayyem. Naragsak ti saritaanmi a dua.

Bayat ti panagsarsaritami, immasideg ti maysa a lalaki iti ridaw ti siled tapno mangala iti delata a soda iti vending machine. Tinaldiapannak ket kinunana, “Apay, sika kadi ni Tom Monson?”

“Wen,” insungbatko. Ket karuprupam ni Hemingway.”

Imbagana nga isu ni Stephen Hemingway, anak ni Alfred Eugene Hemingway, a nagserbi a mamagbagak idi maysaak pay a bishop adun a tawen ti napalabas ken isu ti aw-awagak iti Gene. Imbaga kaniak ni Stephen nga adda ni tatangna iti dayta met la a pagaywanan ken asidegen a matay. Aw-awagan ni Gene ti naganko, ket tinarigagayan ti pamiliana a makontakdak ngem awan ti masarakanda a numero ti teleponok.

Nagpadispensarak a dagus ken kimmuyogak ken Stephen a napan iti siled ti sigud a mamagbagak, a nagguummongan met dagiti dadduma pay nga annakna, pimmusayen ti asawana adun a tawen ti napalabas. Imbilang dagiti miembro ti familia ti pannakakitak ken Stephen iti lugar a paginanaan kas sungbat ti Nailangitan nga Ama iti dakkel a tarigagayda a makitak koma ti amada sakbay a matay ket sungbatanna ti awagna. Nariknak pay a kastoy, gapu ta no saan koma a simrek ni Stephen iti siled a simmarungkarak iti dayta met la kanito, diak koma ammo nga adda ni Gene iti dayta met la a pasdek.

Nangtedkami iti pammendision kenkuana. Nagtalinaed ti espiritu ti talna. Naragsak ti isasarungkarmi, kalpasanna pimmanawakon.

Iti kabigatanna naammuak iti maysa nga awag iti telepono a pimmusayen ni Gene Hemingway —20 minuto laeng kalpasan ti yaawatna iti pammendision manipud iti anakna a lalaki ken kaniak.

Inyebkasko ti naulimek a kararag ti panagyaman iti Nailangitan nga Ama para iti pangtarabay nga impluensiana, a nangguyugoy iti isasarungkarko iti sentro a pagaywanan ken nangiturong kaniak iti patpatgek a gayyemko a ni Alfred Eugene Hemingway.

Kayatko a panunoten a dagiti kapanunotan ni Gene

Hemingway iti dayta a rabii—idi mariknami ti Espiritu, nakiraman iti napakumbaba a kararag, ken nangipeksa iti pammendision ti priesthood— ket nangulit kadagiti balikas a nadakamat iti himno a “Master the Tempest Is Raging”:

*O Mannubbot, agbatika!
Dinak panawan nga agmaymaysa,
Ket sirarag-o a makasangladakto
Ken iti sang-at makainanaakto.*

Paggugustok pay la dayta a himno ket paneknekak a makapaliwliwa daytoy:

*Kasano man ti rungsot ti bagyo iti baybay
Demonio man wenno tao wenno ania pay,
Awan danum a mangpalned iti bapor a yan
Ti Apo ti taaw ken daga ken tangatang.
Agtungpalda amin iti pagayatom:
Agulimekka, agtalnaka.¹*

Iti baet dagiti lua ken pannubok, iti baet dagiti buteng ken ladingit, iti baet dagiti sakit ti nakem ken kinaliday iti pannakapukaw dagiti ipatpateg, adda pammatalged a ti biag ket agnanayon. Ti Apo ken Mangisalakantayo ket isu ti sibibiag a pammaneknek a kasta ngarud.² Umdasen dagiti balikasna iti nasantuan a kasuratan: “Agtalnakayo, ket ammukenyo a siak ti Dios” (Salmo 46:10). Paneknekak daytoy a kinapudno.

DAGITI NAGADAWAN

1. “Master, the Tempest Is Raging,” *Hymns*, no. 105.
2. Kitaen iti Richard L. Evans, “So Let Us Live to Live Forever,” *New Era*, Hوليو 1971, 18.

PANANGISURO MANIPUD ITI DAYTOY A MENSAHE

Makaliwliwa daytoy a mensahe kadagitay naka-pukawen iti ipatpateg gapu iti patay wenno dagitay agkarkarigatan iti pannubok. Mainayon iti mensahe ni Presidente Monson, mangibinglaykayo iti maysa kadagiti sumaganad a nasantuan a kasuratan, a maibatay kadagiti kasapulan dagiti sursuruanyo: Job 19:25–26; 1 Taga Corinto 15:19–22; Mosiah 24:13–15; Doktrina ken Katulagan 122:7–9. No maguyugoy, mabalinyo nga ipaneknek maipapan iti talna nga impaay ti Mangisalakan kadakayo kadagiti pannubokyo.

AGTUTUBO

Agasam Koma ti Pusok

Ni Kelsey LeDoux

Iti anibersario ti ipapatay ti kabsatko a lalaki, inutobko maipapan iti biagko manipud pay idi ipupusayna. Nalagipko saan laeng ti nakaro saem a nariknak no di ketdi dagiti pay parabur nga inted ti Dios kaniak.

Diak kaano man maawatan no kasano a maibaga dagiti tao a ti ipupusay ti maysa nga ipatpateg ket mabalina mangisangbay kadagiti bendision. Diak maawatan no kasano a posible a maaddaanak iti rag-o ken panagyaman iti maysa a banag a namagsakit unay iti riknak. Nupay kasta, adda maysa a rabii a namangbalaliw a namimpinsan iti pannirigak.

Nakariingak iti tengnga ti rabii a nakadagdagsen unay ti pusok. Diak makaanges gapu iti nakaro a sakit. Nagparintumengak ket nagsaibbek a nagkararagak iti Nailangitan nga Amak. Iti unos ti biagko nasuruannak maipapan iti Pannubbot ken iti namilagruan a pangpaimbag a bileg ni Jesucristo. Ita masubsuboken ti pammantik. Pudno kadi a namatiak? Indawatko iti Amak iti Langit nga agasanna koma ti pusok. Nakaro unay ti sakit tapno sagabaek nga agmaymaysa.

Kalpasanna nariknak ti talna, gin-awa, ken ayat a simmallukob iti sibubukel a bagik. Nariknak a kasla in-yarakup ti Dios dagiti imana kaniak ken salsalagnibannak manipud iti nakaro a sakit a nariknak. Kailiwko pay laeng ti kabsatko a lalaki, ngem kinabaelak ti kumita iti sabali a mata. Adu pay dagiti masursurok manipud iti daytoy a padas.

Ammok a nakasagana a gun-oden ti ayat ken talna ti Apo. Kasapulantayo laeng ti makiranud.

ANNAK

Pilien ti Agbalin a Natalna

Kuna ni Presidente Monson a no natalna ken nara-kemtayoy, makariknatayo iti talna ken makagun-od iti napigpigsa a pammaneknek maipapan iti Nailangitan nga Amatayo. Ken nasaysayaat a maguyugoy natayo ti Espiritu Santo maipapan kadagiti wagas a pakatulongantayo kadagiti dadduma pay.

Mangisurat wenno pagsasaritaanyo kadagiti naganak kadakayo ti maysa a wagas a pakapagbalinanyo a natalna. Kalpasanna maaddaan iti oras a mangpadas iti

daytoy itoy a lawas. Kalpasan ti panangaramidyo, mabalinyo nga isurat iti diurnalyo maipapan kadagiti rikna ken pannignay a napadasanyon.



Pammati , Pamilia , Tulong

Panagaktibo

Sikakararag nga adalenyo daytoy a material ken, no maitutop, ilawlawagyo daytoy kadagiti kakabsat a babbai a sarungkaranyo. Usarenyo dagiti saludsod a mangtulong kadakayo a mangpapigsa kadagiti kakabsatyo a babbai ken mangaramid iti Relief Society nga aktibo a paset ti bukodyo a biag. Para iti ad-adu pay nga impormasion, mapan iti reliefsociety.lds.org.

Nallukoynatayo ti propetatayo, ni Presidente Thomas S. Monson, a “tumulong a mangispal kadagiti agkasapulan iti tulongtayo ken mangitag-ay kadakuada iti nangatngato ken nasaysayaat a dalan. . . . Daytoy ti aramid ti Apo, a no addatayo iti panangibaon ti Apo, . . . maikaritayo iti tulong ti Apo.”¹

Adun a tawen ti napalabas sinarungkaran ni LaVene Call ken ti kompanionna iti visiting teaching ti maysa a saan unay nga aktibo a kabsat a babbai. Nagtuktokda ti ridaw ket nakitada ti maysa nga ubing nga ina a nakabata. Kasla masakit daytoy, ngem naammuanda a dagus a problemana ti panagbartekna. Nagtugaw ken kinasarita dagiti visiting teacher ti marigrigatan nga ubing nga ina.

Kalpasan ti ipapanawda, kinunada, “Isu ket anak ti Dios. Adda pagreb-benganta a tumulong kenkuana.” Isu a masansan a simmarungkarda. Tunggal isasarungkarda, makita ken mariknada ti nasayaat a panagbalbaliwna. Kiniddawda iti kabsat a babbai a dumar-ay iti Relief Society. Nupay addaan panagkedked, dimmar-ay a masansan iti kamaudiananna. Kalpasan ti panangallukoy, nakimisa

isu ken ti asawa ken anakna a babbai. Narikna ti asawa a lalaki ti Espiritu Santo. Kinunana, “Aramidek no ania ti isingasing ti bishop.” Itan aktiboda iti Simbaan ken nailantipdan iti templo.²

Manipud kadagiti Nasantuan a Kasuratan

3 Nephi 18:32; Doktrina ken Katulagan 84:106; 138:56

Manipud iti Pakasaritaantayo

Ti panangtulong kadagiti nayawan nga agsubli iti ebanghelio ni Jesucristo ket kanayon a paset ti panagbalin a Santo iti Ud-udina nga Aldaw ken miembro ti Relief Society. Kinuna ni Presidente Brigham Young (1801–77), “Agkikin-naasitayo koma, . . . ken tarabayen koma dagiti makakita dagiti bulsek agingga a makitada ti dalan para iti bagbagida.”³

Eliza R. Snow, maikadua a sapasap a president ti Relief Society, siyayaman a binigbigna dagiti aramid dagiti kakabsat a babbai iti Ogden, Utah, USA, a mangpapigsa iti tunggal maysa. “Ammok unay nga adu ti naidonar [a serbisio] a di kaano man nakaabot kadagiti libro

ti [kasuratan],” kinunana. Ngem ti panangbigbig a naidulin ti nailangitan a kasuratan ti aramid dagiti kakabsat a babbai bayat ti panangtulongda kadagiti limmamiisen ti puspusoda, kinunana: “Kinuna ni Presidente Joseph Smith a nabukel daytoy a gimong tapno mangisalkan kadagiti kararua. . . . Naidulin ti sabali pay a libro ti pammatiyo, kinaimbagyo, dagiti nasayaat nga aramidyo, ken dagiti balikasyo. . . . Awan ti napukaw.”⁴

DAGITI NAGADAWAN

1. Thomas S. Monson, “The Sacred Call of Service,” *Liahona*, Mayo 2005, 55, 56.
2. Surat iti sapasap a panguluen ti Relief Society manipud iti anak a babbai ni LaVene Call.
3. Brigham Young, iti *Daughters in My Kingdom: The History and Work of Relief Society* (2011), 107.
4. Eliza R. Snow, iti *Daughters in My Kingdom*, 83.

Ania ti Maaramidko?

1. Agtalekak kadi a mangkid-daw iti saan unay nga aktibo a kabsat a babbai tapno makikuyog kaniak a dumar-ay iti miting ti Relief Society?
2. Marikna kadi a komportable dagiti kakabsat a babbai nga ay-aywanak a mangsaludsod kaniak maipapan iti ebanghelio?